

〔和漢三才圖會^{十二}〕人身法于天地附譬于家財

按頭則天、足則地、骨則石、肉則土、筋則道路、毛髮則草木、兩眼則日月、血則海水、息則風、二便則雨、汗則露之類、古人概所言之也、今又譬之家室、管見恐有齟齬乎、頭則棟、足則礎、骨則柱、肉則壁、筋則纏繩、毛髮則薨、口則門、眼則窻、血則井水、三焦則墻、膀胱則水溝、命門則柴薪、肺則玄關、大腸則裏門、肝膽則決斷所、小腸則庖廚、腎則金銀本雖屬水、而假譬之金銀、脾胃則米穀、心則主人、能治而無過不及、則家齊財足焉、蓋米穀日用之命根、金銀万物之寶基也、放敗失之者、不可終天年而已、